



Buka Hatene Pontu Katalitiku Konfliktu Urbanu

Violensia, Sidade no Redusaun Pobreza iha Rai foin atu Dezenvolve án

Dili, Timor-Leste nudar Kazu Estudu

Dokumentu Informativu

1.0 Introdusaun

Iha Abril 2006, Dili, sidade kapital Timor-Leste, moris akontesimentu bót ida nudar violensia kolektiva, wainhira kontradisaun konaba tratamentu la hanesan iha forsas armadas laran nakfera no rezulta iha ema balun mate, uma besik 2,000 át no ema besik náin 150,000 sai dezlokadus. Explozaun violensia kolektiva ida nuné fo fiar ba persepsaun katak urbanizasaun nebe la kontroladu iha relasaun ho violensia. Relasaun ida né empirikamente kontestavel, no dinamika espesifiku hosi violensia iha sidade laran, wainhira mosu, jeralmente la dun sai nudar materia peskiza, biar iha realidade asuntu ida mak sei kontinua mosu. Iha kedas tinan 2008 populasaun urbana iha mundu hakat liu tiha ona marka 50%, no wainhira tóo iha 2050, besik 2/3 hosi total populasaun 9 bilioens nudar projesaun iha mundu tomak sei hela iha sentrus urbanus. Foti nudar referensia hosi Jane Jacob ninia deskrisaun kona ba sidade hanesan “komplikadu maibe organizadu”, ami nia estudu kona ba Dili – ida husi kazus 4 projetu *Urban Tipping Point* (UTP) – buka atu artikula dinamika iha nebe tensaun sosial no konfliktu entre ema bele “nakfilak” ba violensia kolektiva ida bót. Liu husi “*urban tipping process*” ami buka atu elabora dinamika hirak né.

Importante ba kuadru konseitual ida ne mak kompriensaun ida luan konaba **konfliktu** nudar tensaun sosial mak rezulta husi aspirasaun ba poder no autoridade husi lider politiku sira, emprefariu sira, setor seguransa, no ator sosial selu-seluk no mos ema importante sira iha sosiedade laran. Konfliktu ida nune sempre

iha hela deit sosiedade laran, no bele la hamosu violensia. Distinsaun ida nuné entre konfliktu no violensia tau hamutuk ho fokus iha **faktor kauza** (empirikamente no subjektivamente konsidera nudar divizaun sosial iha nebe iha tensaun estrukturada ida entre individuais no grupus ho interese definidu), no **kondutores konfliktu** (kondisoens ho potencia atu hamosu rungu-ranga sosial, opresaun, ka konfrontasaun nakloke). Prezensa, no interasaun, faktor kauza ho kondutores konfliktu hamosu ambiente ida iha nebe “tama fatin” ba individuais sira atu envolve iha violensia nebe bele hetan kasitgu jeralmente kik liu.

Hamutuk, faktor kauza ho kondutores konfliktu sai nudar elementu importante mak kondisiona **konteistu** nebe lori ba tensaun sosial no konfliktu entre individuais mak bele nakfila ba violensia kolektiva ida bot. Pontu kulminante konfliktu normalmente mosu iha konteistu nuné no mai husi **ator xave** balun: hirak nee inklui *ema sira nebe bok an uluk* (individuais sira nebe involve uluk iha violensia); *sira nebe halo ligasaun* (individuais sira nebe hatene ema barak iha grupu laran, no karik mos hatene ema husi liur, mak karik bele influensia ema seluk atu tuir sira nebe bokulun ona); *peritu sira* (ema sira nebe ho kualifikasaun atu halao asaun nebe iha); no ema sira nebe ho *personalidade karismatiku* (ema sira nebe mak bele konvense ema barak atu halo tuir sira ninia hakarak).


La ho intensaun atu implika tempu ida determinadu, maibe dalam diak ida atu projeta **prosesu katalizasaun urbanu** mak hafahe prosesu ne ba faze tolu. Faze I mak ambiente urbanu ida iha nebe nakonu ho sinais konfliktu

ho tensaun sosial. Konfliktu iha faze ida ne relativamente estavel, katak konfliktu ne limitadu hela ba (maski potesnsialment iha nivel superior) violensia entre individuais, no bele analiza ho baze iha *faktor kauza* tuir ambiente urbanu no nasional. Faze II mak “pontu katalitiku konfliktu”: ida ne iha nebe kondutores konfliktu hetan malu ho *faktor kauza* no hamutuk halo konfliktu ne sai bot, no halo konfliktu ne naklekar liu husi sosiedade tomak no resulta iha violensia kolektiva. Faze III mak transformasaun ida iha ambiente urbanu rasik. Iha faze ida ne efeitu husi violensia kolektiva durante konfliktu nakfera sai nudar explikasaun ba situasaun status quo mak lao hela.

Metodolojikamente, konseitu kona ba ambiente urbana kompleksu no seidaok organizadu nune prezisa aproximasaun ida mak bele ajuda kompriende “dalam ba”, ka momentu atu “tama iha”, violensia kolektiva. Peskiza kona ba situasaun Dili nian halao ho metodolojia partisipatoria no utiliza versaun

bazika “teoria fundamentada”, ka reformulasaun sekuensial argumentu hirak mak iha. Duke uza teoria atu dezenvolve ipoteze balun mak ikus mai tes ho analize empiriku, peskiza nebe halao hola direasaun husi “oin fila ba kotuk”, nune rekoila uluk mak informasaun hafoin reorganiza informasaun ne tuir kategoria, ejemplu, asuntu no narativu. Bainhira servisu peskiza lao ba oin, peskizador sira buka hadia nafatin narativu no temas nebe mosu bebeik hodi bele halo reflesaun ida klean no kontinuo. Iha Dili, intensaun husi aprosimasaun partisipatoria laos deit atu hetan sentidu oinsa ema importante sira moris Krize ne, maibe mos atu hare oinsa individuais sira husi lalaok oi-oin interpreta violensia ho ninia kauza hafoin liu tiha tinan nen ona. Kestaun xave inklui konaba autoridades publiku sira aprende buat ruma husi Krize ne ka lae, no kauzas impornate nebe hamosu Krize ne hetan ona atensaun ruma ka lae, no atu ahtene karik violensia 2006 sei repete fali ka lae.

Figura 1: Prosesu Katalizasaun Urbanu



2.0 Kompriende Krize 2006-07

Analize barak nebe iha ona konaba krize 2006-07 hamosu nudar kauza ba violensia nebe naklekar iha rai laran servisu laek ba foinsae sira. Estudu ida ne buka atu dezenvolve versau ida sensitivu ba konteistu konaba eventus krize 2006-2007, liu-liu fator kauza no kondutores ba konflitu no mos ator barak nebe involvidu, no hatur artikulasaun ida klean iha kompleksidade urbana sidade ida nian. Partikularidade ida ne dala barak haluha tiha, tamba Dili dala barak konsidera simplesmente distritu ida husi distritu 13, hodi haluha tiha katak ho ema hamutuk 250,000 distritu ida bot liu mak ne ona, ho kuaze 1/4 husi total populasaun moris iha neba.

Fator kauza prinsipal iha Dili nebe iha tempu krize 2006-07 inklui diferensa bot ida entre formas autoridade tradisional no valor demokrasia liberal, no diferensa entre “lorosae sira” no “loromonu sira”, ho baze iha dezenvolvimentu sosio-ekonomiku la hanesan iha espasu urbanu ida iha nebe maioria populasaun Dili nian moris ba. **Kondutores konflitu** mak identifikiadu inklui inveija sosial, problemas historiku entre elite politiku, dezempregu ba foinsae sira mak bot tebes, inseguransa nain ba rai, ho fragmentasaun iha setor seguransa laran. Identifika situasaun ho fator kauza hirak nebe iha, kondutores ba konflitu hamosu konteistu id aiha nebe ator xave sira bele explora interese individual grupu no tau sira hasoru malu.

Sira nebe bok an uluk iha krize 2006-07 mak grupu petisionariu husi Forsas Armadas Timor-oan (F-FDTL) nebe halerik sira nian deskontentamentu ho sira nian superior sira – ho argumentu katak membrus instituisaun ne nian mak husi parte loromonu hetan no hasoru diskriminasaun. Demisaun ba grupu petisionariu husi F-FDTL halo sira halao protestu iha palacio governo iha Abril 2006. Grup u nebe mos mak bok an uluk mak foinsae sira sira no grupu jovens nebe involvidu foun-foun kedas iha violensia durante manifestasaun hodi provoka reasaun naban-naban mak rezulta iha istraga sasan no deslokamentu membrus populasaun kuaze iha sidade laran tomak.

Violensia naklekar lais tamba prezensa no knar sira nebe fasilita **ligasaun** – ho baze iha relasaun parentesku, interasaun sosial tuir kostume tradisional (lisan). Lealdade importante iha sosiedade Timor-oan mak rede familia no grupu familia nebe iha orijin iha uma lulik. Relasaun parentesku laos deit fasilita migrasaun no asesu maluk sira iha Dili nudar rede sosial ida, maibe ida ne mos hanesan rede sosial fasilita organizasaun ida lais hodi maluk sira tau matan ba malu iha tempu konflitu. Individuais ho grupu sira mai husi distritu nebe hanesan mos organiza ho esforsu atu hetan protesaun ba sira an rasik durante tempu rupturas ordem sosial mak rezulta iha krize, prosesu ida nebe lori ba fragmentasaun ida bót espasu urbanu ka sidade laran.

Peritus balun involvidu iha violensia. Primeiro, iha ema barak mak iha relasaun ho movimentu resistensia maibe iha tempu independensia hasoru exkluzau sosial no politiku. Kuinesidu nudar “veteranus”, ema sira ne hamutuk forma grupu klandestinu oin-oin no grupu artes rituais nebe bele hetan iha Dili. Tuir fali mak grupu kuinesidu nudar artes marsiais, barak nebe bele hari iha tempu Indonesia nian. Ikus liu mak mos halo parte grupu peritus, mak sira nebe kuinesidu nudar grupu estrada ninin sira. Grup u ida ne mosu ho baze iha comunidade maibe nudar rezultadu husi rivalidade nebe iha entre grupus rua uluk ba. Formasaun grupus hirak ne mak loke dalam ba violensia naklekar iha sidade laran tomak.

Maibe, peskiza ne sujere katak grupu artes rituais no marsiais no mos grupu estrada ninin sira la involve an direktamente iha organizasaun violensia nebe mosu. Maibe, sira nian involvimentu rezultadu instrumentalizasaun no rivalidade entre elite politiku Timor-oan sira, inklui **personalidade karizmatiku** balun nebe goza apoiu kuaze hanesan apoiu nebe kultu balun hetan iha populasaun let. Ida ne hamoris fila fali kestaun lorosae no loromonu, hodi haburas konteistu polarizasaun id aiha nebe ator oin-oin bele involvidu iha violensia laran.

Prosesu ida ne mos hetan fasilitasaun husi karakteristik importante balun nebe nebe halo Dili oinseluk husi fatin seluk iha Timor-Leste:

(1) *Emas kahor malu.* Nudar sentru ba dezvoltamentu ekonomiku no politiku, Dili dada ema oin-oin husi distritu 12 seluk – halo Dili sai tiha mundu kik-oan ida ho sub-kultura Timor-oan sira nian oin-oin ho lian hamutuk 37. Nunee kahor malu ida ne mos lori tama mai Dili konfliktu familiar, tensaun entre grupus no disputa oin-oin, no bainhira sira ne hela besik malu nafatin ne mos fator ida mak kontribui ba intensidade konfuzoan nian.

(2) *Diar tradisional fraku.* Ba maioria Timor-oan sira, fiar tradisional (lisan) kontinua nudar estrutura moris loron-loron nian – tebes duni, mekanismu nebe haktuir normas no regras husi lisan kontinua implementa implementa nafatin, no importante nudar referensia nebe Timor-oan sira halai ba hodi rezolve konfliktus bainhira iha disputa familia ka iha tensaun ruma iha comunidade laran. Iha Dili, mekanismu tradisional hirak né la dun han malu diak ho demokrasia liberal kona ba konseitu justisa no lei no orden.

(3) *Problema nain ba Rai.* Aspeitu sentral ida husi lisan mak importansia uma lulik, nebe la os deit determina estrutura relasaun individual entre familia no grupu, maibe mos hatodan importansia nain ba rai no utilizasun rai. Iha Dili uma lulik mak la iha, nune rezidentes sira mantein lealdade ba sira nian uma lulik distritu orijen. Hamutuk ho kompetisaun ba nain rai nian mai husu tempu portugues no Indonesia nian, no mos tamba la iha lejislasaun ida dauk, inseguransa nain ba rai sai mos fonte prinsipal violensia no provoka konfliktu iha sidade.

(4) *Seguransa mak barak liu.* Iha Dili, buat hela besik malu, prezensa ema husi distritus hotu-hotu no mos prezensa husi “fornesedor seguransa” oin-oin privadu ho formal hamutuk ho setor seguransa ida iha nebe sei iha kompetisaun ida entre forsa exersitu (F-FDTL) ho polisia nasional (PNTL) halo ambiente urbanu sai komplikadu liu tan.

Tau hamutuk aspetu urbanu Dili nian hirak né, halo Dili hanesan espasu ida “tur sala” iha sosiedade Timor-oan laran, maibe tamba Dili “sidade importante” no “determinadu liu” tamba prezensa Nasoins Unidas nian no ajensia dezvoltamentu seluk is period. Tebes katak insituisoens barak husi governu no privadu, biar nasional ka internasional hela fatin iha Dili biar barak dehan katak sira serbisu “iha distritus”. Dala barak Dili mesak mos sai fali hanesan Timor-Leste, ida ne estraga fali esforsu dezvoltamentu nebe buka atu benefisia populasaun tomak, duke sira balun deit mak besik ba sistema.

3.0 Rekomendasaun

Ofisialmente bele dehan katak krize remata bainhira halao eleisaun iha 2007, iha nebe governu koaligasaun ida forma ho lideransa Primeiro Ministro Xanana Gusmao, no Dili mos hamenus uituan violensia kolektiva, inklui mos krize politika bot iha 2008. Ami nia peskiza sujere katak dame mosu nudar rezultadu husi mudansa institucional maibe la os husi mudansa sosial, ida né signifika katak dame nebe iha sei frajil nafatin. Iha nível nasional, nudar esforsu atu prevene violensia kolektiva atu mosu fali, governu institucionaliza “komandu konjuntu”, atu mantein kolabora-saun entre PNTL ho F-FDTL. Maibe Komandu Konjuntu rasik la rezolve rivalidade nebe iha entre fornecedor seguransa formal rua né – faktu ida evidente durante *Operasaun Ninja* 2010 – pelu menus Komandu Knjuntu fo impresaun ida katak iha “frente seguransa unidu” ba populasaun iha tempu krize. Ida neé mos kontribui ba hodi denunsia diferensa “etniku” entre lorosae no loromonu hanesan “divizaun mekanizadu” ida.

Maibe, Krize mos fo emfaze oinsa “kompleksidade organizadu” sidade kapital nian mos sai hanesan funsaun ida ba prezensa no dependensia ba kompania seguransa pribadu sira, no mos prezensa kontinua grupu oi-oin foinsae sira nian nudar fonte seguransa iha nível comunidade. Ida mos tamba membrus barak PNTL no F-FDTL nian mos afilia ho grupus hirak né ida, mak signifika katak mutiplisidade institucional setor seguransa hamosu konfuzoan kona ba

fronteira entre grupu informal no formal tamba fronteira entre rua ne kona ba knar, responsabilidade no jurisdiksaun la dun klaru ona. Nune mos, afiliasaun barak bele hakiak kolaborasaun informal no iha potensial atu haforsa rezolusaun konfliktu.

Nune mos, krize mos fo empaze oinsa partikularidade sidade Dili nian sai fator importante iha violensia kolektiva nebe nakfera. Sujere mos katak prezisa konsidera Dili nudar espasu urbanu ida atu nune bele asegura katak kondisaun hirak nebe halo parte prosesu

hodi nakfilak konfliktu ba violensia bele hetan atensaun ba solusaun. Rekomendasaun konkretu barak mak bele hamosu ho bzae iha problemas basiku rua né (haree ba tabela 1 iha karaik mai). Biar hirak nee fahe ba kop importante rua, barak husi ami nian rekomendasaun depende ba malu. La prezisa atu dehan, ami nian sujestaun laos espesifiku deit ba ator xave sira, maibe buka enkoraja hanoin oinseluk konaba dezafiu atu hetan estabilidade politika, sosial no ekonomiku iha Timor-Leste, no liu-liu iha Dili.

Tabela 1: Rekomendasaun Prinsipal

(1)	<i>Foti Dili ho seriedade nudar espasu urbanu</i>
a	Hamenus natureza fragmentadu Dili nian prezisa fatin ba espasu publiku estruradadu (hanesan parke, fasilidades despartivu ho sentru komunitariu) atu liga bairus hirak nebe hafahe malu.
b	Rezolve tensaun no divizaun sosial prezisa prosesu planeamentu partisipatoriu nebe lideres lokal sira bele partisipa iha prosesu haktou desizaun.
c	Dili ida urbanu prezisa estrutura munisipal ida rasik nebe bele hakbit instituisaun hirak nebe iha ona (hanesan conseilu suku) ka harí instituisaun foun (hanesan Administrador Munisipiu eleitu).
d	Tamba asuntu nain ba rai kontinua sai problema bot ida iha Dili, ezbosamentu planu urbanizasaun tempu naruk bele hamenus inseguransa balun iha moris sidade nian.
e	Harí munisipalidades seluk iha rai laran hanesan dalan ida atu enfrenta status Dili nian nudar sidade determinante no supremu.
(2)	<i>Rekuinense kompleksidade provizaun seguransa iha Dili</i>
a	Natureza fragmentasaun Dili nian mos implika katak mekanismu rezolusaun konfliktu mos prezisa adapta ba nesidades komunidadade nian.
b	Hamenus konfliktu ho tensaun entre bairus prezisa enkoraja interasaun entre grupu liu husi partisipasaun iha actividades mak ho sentidu no estrutura diak.
c	Prevene konfliktu atu nakfera ba eskala bót nudar violensia kolektiva, bele depende mos ba atu harí no manan fiar publiku nian iha forsa polisia ida profesional no neutral.

(1) Foti Dili ho seriedade nudar espasu urbanu¹

Konsidera Dili hanesan area urbana ida bele loke dalam ba “desinkorporasaun” sidade ne nian atu hetan atensaun. Tamba natureza relasaun sosial *uma kain* nian iha Timor-Leste, migrasaun husi zona rural ba urbanu iha tendensia atu hare migrantes husi distritu ida hela iha zona hanesan ho baze iha *uma lulik* nebe hanesan. Ba ne susar atu hamosu koezaun sosial, tamba divizaun migrasaun ida nune inevitavelmente hamosu identidade rejional ho rivalidade. Dalam ida atu enfrenta fragmentasaun iha Dili laran mak inklui kriasaun **espasu publiku estruturadu** atu liga divizaun nebe iha entre zonas oin-oin. Hirak nee bele inklui parke, kampu desportu ka sentru komunidadade iha nebe ema bele kahor malu durante organizasaun actividades importantes balun.

Photo 1:
Laiha fatin publiku agradavel iha Dili



Aspetu ida atu konsidera mos mak introdusaun ba **prosesu planeamentu partisipatoria**, iha nebe rezidentes zona ida nian bele kontribui ba prosesu hakotu desizaun kona ba asuntus iha sira nian area. Tebes, iha sosiedade Timor-oan laran importansia ida mos mak ansiaun no lider sira nebe “koalia diak”. Nune fo ba lidere lokal sira iha *aldeia ka nível suco* oportunidade atu involve iha dialogu no iha prosesu hakotu desizaun bele sai nudar dalam ida atu rezolve tensaun no divizaun sosial entre bairu hirak iha Dili laran.

Rekuihese Dili hanesan área urbana ida mos implika identidade administrativu. Maski desentralizasaun foin lalais ne sai hanesan pontu diskusaun politika nian, no inklui iha konteistu Plano Estratejiku Desenvolvementu Nasional Timor-Leste 2011-2030, desentralizasaun rasik bele iha risiko atu aumenta tan kamadas birokratikas bainhira la enkoraja representasaun no partisipasaun lokal. Dezenvolve **estrutura municipal** sai hanesan dalam ida atu aseguara partisipasaun, liu-liu iha area urbana Dili. Maneira ida atu halo ida neé mak hakbit instituisaun sira nebe iha tiha ona, hanesan konseilu suco, husik sira atu bele koalia liu iha dezenvolvementu no planeamentu bairus espesifikus. Bele mos harí **pozisaun Administrador Munisipiu** (dadaun ne iha deit mak Administrador Distritu indikadu). Pozisaun hanesan né bele tulun hadok politika urbana Dili nian husi arena politika nasional no fo tan forsa ba ho estrutura municipal partisipatoria no forums.

Lojika ida atu haktuir husi estrutura municipal no prosedimentu planeamentu partisipatoriu mak ezbosamentu **planu urbanizasaun longu prazu** ba sidade kapital. Ida ne importante liu tamba inseguransa nain ba rai kontinua sai hanesan kondutores prinsipal ba konflitu iha sidade kapital.² Planu ida hanesan ne bele atrai apoiu husi rezidente sira nebe tenki realoka nudar konsekuensia planu ne nian no mos tulun regulariza rejime nain ba rai. Duke fo privilejius barak liu tan ba sidade kapital, distinsaun ida entre zona urbana ho rural bele ajuda **rezolve determinasaun bot ho prioridade Dili nian**. Nune mos paralelamente bele enkoraja dezenvolvementu sidade hira seluk iha rai laran atu nune bele lori investimentu no assistensia ses husi kapital ba iha distritus – nebe, tuir Planu Estratejiku Dezenvolvementu Nasional, nudar estratejia ida mak Governu buka atu implementa.

(2) Rekuinense kompleksidades provizaun seguransa iha Dili

Nudar kontraste ba area rural iha Timor-Leste, Dili sai oinmesak ho populasaun ida kahor malu barak no ho prezensa fontes seguransa oin-oin husi nivel lokal, internasional no formal no informal. Dili mos fatin ida iha nebe estilu

tradisional konaba rezolusaun konfliktu hasoru malu ho lei no orden no polisiamentu komunitariu estilu malae sira nian. Dezafiu bót ida mak la os deit buka dalan ida atu hamosu ko-ezistencia ida nakonu ho dame maibe ko-ezistencia ida mos mak iha sentidu. Dalan ida atu fasilita buat ida ne mak institusionaliza-saun **forum seguransa lokal**. Desafiu seguransa nebe komidade lokal sira hetan la os deit violensia fizika maibe inklui formas ameasa no intimidasaun oin-oin relasiona ho rekursus menus, deslokamentu forsadu, no fiar laek iha setor seguransa formal. Forum seguransa lokal bele fo oportunidade ba membrus komidade no lideres sira hamutuk hetan malu ho rezidentes bairu sira atu diskuti problema importante no mezmua buka rezolve disputa entre individus.

Prosesu partisipatoriu ida nune tenki inklui la os deit lideres lokal rekuinesidu (*xefe aldeia* no *xefe suco*) maibe grupus oin-oin no atores seluk nebe rezidente sira halai ba hodi husu protesaun nudar provizaun seguransa. Governu foin dadaun ne lansa iniciativa ida hanesan ne hodi kria organizasaun sumbrina ida ba grupus artes marsiais importantes balun, maski medida represivu mos foti tiha ona.³ Too oras ne, grupu seluk iha bairus laran barak mak seidak halo parte ba diskusaun ne. Relasiona ba pontu dahuluk, iha imperativu ida atu hamosu interasaun entre grupus foinsae sira nebe atua hanesan forneseadores seguransa lokal iha bairus laran. Dalan ida atu aumenta interasaun ida nune mak halo sira mai hamutuk no hetan malu iha espasu publiku ida mak neutral. Hanesan diskuti tiha ona iha leten, formasaun espasu publiku ida ho sentidu no estrukturadu (hanesan sentru komunitariu no facilidade desportivu) bele **enkoraja interasaun entre grupus** no kria sentimentu ida iha ema ida-ida ninia fuan katak nia pertense no iha ligasaun

Notas rodape

¹ Necesidade atu diferensia Dili husi distritu hirak seluk labele haré hanesan minimiza importansia konaba dezenvolve intervensaun apropriadu iha area rural iha Timor Leste, nebe ema barak terus husi malnutrisaun makaas no laiha asesu ba infraestrutur nebe basiku liu.

² Haré Fundasaun Haburas, (2012), 'Povu nia lian kona-ba rai Timor: Rezultadu husi konsultasaun Matadalan ba Rai', Dili: Fundasaun Haburas.

³ Iha tinan hirak daudaun né haré ona iniciativa lejislativu barak buka atu hamenus atividades arte marsiais, no atu bandu pratika ho treinu durante periodu tomak molok no hafoin halao tiha eleisaun (Dezemburu 2011 – Dezemburu 2012).

⁴ Ba diskusaun ida foin daudaun né kona ba interasaun entre PNTL ho komidade lokal sira haré Belo, Nélson de Sousa C., ho Mark R. Koenig, (2011), 'Institusionaliza Policia Komunitaria iha Timor-Leste: Eksplora Politika konaba Reforma Policia, Dokumentu Okazional No. 9, Dili: Fundasaun Asia.

emosional duni ho sidade ne maibe la os deit ho ninia familia no ho ninia grupu maluk sira.

Photo 2:
Provizaun Seguransa Balu Dili nian



Finalmente, atu iha provizaun seguransa ida efetivu iha Dili presiza halao esforsu ida konsertadu atu asegura katak PNTL mak rekuinesidu hanesan forsa prinsipal atu hametin lei no ordem iha sidade. Daudaun ne, PNTL iha kompetisaun ho fontes seguransa seluk, formal no informal, tamba ne la dun efetivu. Liu-liu, biar PNTL foti ona pasus diak balun iha periodu tinan sanulun liu ba, maibe PNTL kontinua atrapailadu nafatin ho "mentalidade task force" nebe privilejia manutensaun lei no ordem ho forsa deit, maibe haluha tiha serbisu preventivu polisia nian. Biar durante tempu ho tensaun sosial ás resposta "task force" nia bele efetivu, iha loran bain-bain imajen 'task force' nian ida ne bele mos kria fali inseguransa adisional no aumenta fiar laek iha PNTL. Situasaun loran-loran nian presiza **forsa policia ida profesional no imparcial** mak serbisu hamutuk ho komidade (inklui lideres tradisional no grupu lokal foinsae sira) ho esforsu ida atu prevene konfliktu no hametin ordem sosial.⁴

Dokumentu Informativu ida ne prepara husi Jovana Carapic ho Oliver Jütersonke, respetivamente ida nudar kandidatu doutoramentu no hanorin no asistente peskiza iha siensias politika iha *the Graduate Institute of International and Development Studies, Geneva, Switzerland* & ida seluk nudar Xefi Peskiza iha *the Graduate Institute's Centre on Conflict, Development and Peacebuilding (CCDP)*. Oliver Jütersonke mos hanesan Peskizador Asosiadu ho *the Zurich University Centre for Ethics (ZUCE)*.

CCDP hakarak atu hatoo ninia obrigado ba Abilio Belo nebe traduz Dokumentu Informativu ne'e. Obrigado mos ba Joao Boavida ho Henri Myrntinen ba sira nian komentariu ho sujsetaun sira.

Projetu Peskiza husi Universidade Manchester “Buka Hatene Pontu Katalitiku Konflitu Urbanu, Violensia, Sidade no Redusaun Pobreza iha Rai foin atu Dezenvolve án” hetan finansiamentu husi 2nd *ESRC-DFID call for Research on International Development*. Peskiza ba Dili nudar kazu estudu halao husi *Centre on Conflict, Development and Peacebuilding (CCDP)* iha *the Graduate Institute of International and Development Studies, Geneva, Switzerland*.

